

أول أعراض اللامبالاة

ديوان شعر بالعامية المصرية

دار ديوان العرب للنشر و التوزيع – مصر - بورسعيد



اسم العمل : أول أعراض اللامبالاة

اسم المؤلف : إسراء سالم

الجنسية : مصر

التصنيف الأدبي : ديوان شعر عامية

الطبعة الأولى : 2020

الترقيم الدولي : 5 – 13 - 6792 – 977 - 978

رقم الإيداع : 2602 / 2020

تدقيق لغوي : هبة ماردين

تصميم الغلاف : محمد وجيه

المدير العام : محمد وجيه

تليفون : 00201211132879

الإلهادُ

إلى من ألهمتني من صبرها وأعطتني من عزمها ولا تنساني
أبداً من دعائها... أمي

إلى من هو دائماً مثلي الأعلى الذي كان وما زال سبباً لكل
نجاح أصل إليه... أبي

إلى من اختارهما الله ليكونا عوناً لي في نجاحي وسنداً لي
في حياتي ... أخي وأختي

إسراء سالم

أول أعراض اللامبالاة

ديوان بالعامية المصرية

إسراء سالم



مقدمة الديوان

إذا أمعنت النظر في ديوان الشاعرة " إسرائ سالم " تجد فيه من شخصيتها الكثير، ذلك النقاء الظاهر في اختيار القصائد وذلك العنوان الذي يحمل " أول أعراض اللامبالاة " لتفتح الباب على مصراعيه في رؤيتها الاجتماعية و النفسية و إن دلّ ذلك فإنما يدل على تكوينها الفني ومعجمها الذي تختلط فيه العامية بالفصحى المهجنة والناجمة عن صراع نفسي خفي بين تجارب الشاعرة وخبرتها البسيطة في الحياة.

إن تناغم حروف المفردات صنعت من هذا الديوان سمات جنحت للرومانسية تارة والواقعية تارة أخرى. تقول الشاعرة من قصيدة «نظارة شمس»:

أنا حد بنظارته السوداء

شاف الدنيا بنورها المغلوط

واتدفي بظلة أحلامه

يسألها نجاه

فترد سكوت

كما لاحظنا أن قصيدة «بداية ونهاية» قد لخصت جانب
كبير من رؤيتها للواقع وحنينها للذكريات حيث تقول:
طريق سارح على امبارح
ولسا مفاقش على بكرة
ده حال مستقبل العايش
على الدنيا بكام ذكرى

مالت إلى الرومانسية الحزينة فقررت أن تلتزم الصمت
وأن تبقى أحلامها «برا صندوق الحياة»:
اشتباه في وجود ملامح برا صندوق الحياة
كان مجرد حلم سارح جوا بكرة بس تاه

تشكل الأم جانب إيجابي كبير من شخصية الشاعرة
يساعدها ويدعمها ويظهر ذلك في قصيدة «أمي»:
حبيقتي مالكة تفاصيلي

وسارقة روجي لحسابها
يلف القلب ويحيلها
ويجمع عشقه في كتابها

أظهرت ما تعانيه من خلال تجربتها في «الفرقة توهة»
و«كان زمان»، كما أحبت الوطن وعاتبته في قصيدة «أجمل
حد»:

أنا إخلاصي في سكوتي
وصوتي عالي فوق الحد
لكن متخي جوايا
لحين تفهم تحب مجد

إن مجموعة قصائد بهذا التنوع والتلقائية تجاه قضايا
الإنسان ومشاعره يقف أمامها الناقد مفتخراً بتلك
العفوية التي نالت العديد من قصائد الديوان وخاصة
القصيدة التي اختارتها الشاعرة لتحمل اسم الديوان
«اللامبالاة»:

الكسر القاطم ظهر الناس
كان شرخ بسيط لبواقي حنين
متسيبش الحاجة تضيع وخلص
في الآخر تسأل راحت فين

حاولت شاعرتنا أن يكون شعرها صورة من النفس
وانعكاس لما في الروح فجاءت معانيها عذبة، حيث ترى
العالم من خلال أنات نفسها الرقاقة وبهجتها الممزوجة
بقوة انكسارها، فتسرد أمالها وطموحاتها في لغة تسري
كلام لا تشعر فيه بلفظ مفرط أو صورة مغلوطة أو معنى
مفتعل أو فلسفة مصنوعة.

لقد سكنت الشاعرة كل قصائدها وارتحلت بها لكنها لا
تلبث إلا أن تعود للوطن الذي يسكن وجدانها ولا تزال
تعاتبه وتسمو به في نقلات ذات مقاطع تكمن فيها
رؤيتها الفلسفية وهذا ما نراه في أعمالها التي تمت
الإشارة إليها.

تركت شاعرتنا انطباعاً لدى المتلقي لقصائدها أن يستشعر
جمالها وبغوص في معانيها مشاركاً لها في أغلب ما ترسله
من ومضات فكرية رائعة. لقد سيطر الحزن على شاعرتنا
في أغلب قصائد الديوان كما تأرجحت قصائدها بين
الكلاسيكية، الرومانسية، الرمزية، والواقعية، فتحمل في

طياتها أبعاداً زمانية، مكانية، وإنسانية تشير إلى شاعرة
جادة تمتلك الكثير من الأدوات التي تجعلها من المتميزات
في مجال الشعر العامي.

أستاذ دكتور حسن يوسف \ عميد معهد الدراسات
الآفرو آسيوية والعميد السابق لكلية الآداب بجامعة
قناة السويس

بداية ونهاية

ختام السكة أحياناً

يبقى شبيه بأولها

بداية... نهاية

مش فارقة

مادامت ناقصة تفاصيلها

بنبدأ في الحياة نحلّم

بنستسلم...

نسيب روحنا

تدوق فرح وبُكا في سنين

وفجأة تشيب ملامحنا

وعُمر يعديّ فيهدّي

يعلّم ع الوشوش تجاعيد

مشاعر عايشة تتغيّر

مفيش في السكة حد أكيد

وأصعب حاجة توجعنا
لما يسد خطوة فراق
وداق فينا على كل اللي راح منا
نقول عشاق
بنعرف قيمة اللي يروح
في وقت يكون خلاص مش جاي
وطبع القلب للغايين
يكون شاري ومش نساي
في ناس على ظل أرواحنا
بتهوى تعيش وتملّش
وناس من كتر قسوتها
نخاف مشاعرنا متقلّش
يساوي القلب تقسيمته
يكملّ في الطريق عادي
مين البايع... مين البادي
معدش يفيد بحاجة خلاص

خلاص الروح... بنسمحله
يفضفض بس ع الكراس
وفي السكة... ربيع وخريف
خطوط متساوية في الأحداث
ببان فتحاها سِكتنا
قلوب مقفولة رغم الناس
وذكرى لكل أوجاعنا
ومخلوطة بضحكتنا
يا بيتنا يا الي روحت بعيد
أخذت معاك برائتنا
يا شارع كان لاممنا زمان
وحان الآن نتوه منه
بكل مشاعر الحرمان
بواقي العشق بيحنتوا
وحودات الطريق مايلة
على هيئة حنين مخنوق

ومتكّث على فروع الشجر
خايف بيان في النهر
وتفضح مايته العزبة
ملامح شينا والتجاعيد
عنيد القلب في وفائه
وإخلاصه لكل بعيد
في ليل السكة شُبورة
تَغَيِّم على طريق بكرة
فمنشوفشي غير امبارح
منفهمشي غير الذكرى
ولما نمل م الوحدة
نشعبط فوق قلوبنا آمال
نصدّق فيها ونحاول
ونسرق فرحنا
ترحال
في بال دائماً بيايلنا

فترمي غلطنا ع المكتوب
يا دوب الحزن علّمنّا
نعيش بعقول ومش بقلوب
يا دوب الفرح علّمنّا
نداري عليه
فراح ومجاش
وعاش الدمع على ورق الشجر ساكن
لحد ما باش
طريق سارح على امبارح
ولسا مفاقش على بكرة
ده حال مستقبل العايش
على الدنيا بكام ذكرى
بكام فكرة
تسيب علامات
لوقت ما مات
وانكسر حيلها

ورجعت ثاني م الأول
بتتعمّز على غيرها
ختام السكة... أحياناً
يبقى شبيه بأولها

برا صندوق الحياة

اشتباه في وجود ملامح
برا صندوق الحياة
كان مجرد حلم سارح
جوا بكره بس تاه
لما باش الحيط بشوقه
برا حد الأمنيات
كان طبيعي يكون مجرد حد عايش
ع الي فات
والمجرد من طموحه
دقًا قلبه في كوم جروحه
ارتكز ظهره الي مايل
فوق كتاف الذكريات
اشتباه في وجود سنين
مسحوبين عكس اتجاه

لافة دوامة الحنين
جوّا بجرال لا نجة
لّسه موج القلب قاصر
رغم تجاعيد الغياب
الحضور ع الماضي قاصر
والي جاي منغير حساب
في حسابات القلب جايز
في الغرق طوق النجاة
بّرا صندوق الحياة
صعب نلقى لفرح عازة
لما طفل في حضن أمه
صلى على والده الجنازة
النهار ده زي بكره
كل يوم شبه الي قبله
يسأل الطفل بسذاجة
يعني إيه إرهابي قابله؟

طب مسافر عند مين؟
هو ليه مش جاي خلاص؟
بعده حتى البيت حزين
دنيا مبقاش فيها ناس
طل سقف الوحدة بدري
قبل ما يَظَل الشباب
طفل كان فرحان بيجري
شاف أبوه مكتوب غياب
برا صندوق الحياة
في ركن تاني
عجوز مريض
حزنه واصل منتهاه
ابنه باعه وراح بعيد
والأكيد إن المريض
كان صبور... طيب... عنيد
كان يشيل من بوقه لُقمة

لجل ما ابنه يكون سعيد
كان يكبر فيه ويعلم
لجل يوصل للشهادة
كان يداري عليه همومه
لجل ميحسش بحاجة
ابنه عالي طموحه جداً
كتف أبوه استغنى عنه
عاش ضعيف ساند عليه
وأما كبر اتبرا منه
أب مستني أما شاب
الولاد يجوا ويحنوا
برّا صندوق الحياة
كان في بنت على الرصيف
في الشوارع عايشة باكية
تايهة مش لاقية الرغيف
والمخيف إن الوسيلة للسعادة

في الشحاة
مين يحط في إيدها أكثر
مين هيدي فلوس زيادة
والمسمى للوظيفة
بنت أولاد الشوارع
والإقامة تحت كوبري
أو على باب الجوامع
لسه في مليون جريح
برا صندوق الحياة
لسه مفتاح السعادة قبل فتحه
ألف أه
لسه مخنوق الحنين
لف حبله على السنين
لسه ناس تصنيف وجودها
برا صندوق الحياة

أمي

دي أمي غير بقيت الناس
تزيد حلاوتها بالثانية
بيملك نبضها إحساس
يوزّع حبه ع الدنيا
بشوف الكون بزاوريتها
وبكتب فوق جدار شوقي
بانها وحدها ساكنة
ما بين الدم وعروقي
حببتي مالكة تفاصيلي
وسارقة روجي لحسابها
يلف القلب ويميلها
ويجمع عشقه في كتابها
وفي ميزان كل أحبابي

مفيش كفة تزيد عنها
ومهما بقول كلام حي
ما يوصف ذرة في حنانها
أداري في حضنها همومي
تشيل عني وتسمعها
وبفرح لو يقولوا الناس
بإني شبهها في طباعها
كبرت ولّسه بتفنن
أعيش الطفلة وياها
أنام وأبكي ما بين أيديها
وأصدّق بس في دواها
ولما أنجح أبوس أيديها
وبطمع منها كام دعوة
وكام أكلة وكام ضحكة
وكام مرة بزعلها
وبغلط قد ما بغلط

تسامح مرة والثانية
وعشرة ومئة وسني
دي وحدها عايشة تديني
وبيني وبينها ميت قصة على حكاية
على ذكرى
وحبها أبدي ومؤك
ومخلوق فيا بالفطرة
خبايا الروح بتستسلم
وتتفصل في توب القلب
بنظرة من عيون أمي
بتكفيني معاني الحب
وأحب الضعف قدامها
وبقوى بيه قصاد الناس
أنا تكوين رضا أمي
وبتنفس لها إخلاص
نصبي من الفرح نولته

وعادي الباقي لو أحزان
وقلمي حبره كالعادة
بقي يكتب لها إدمان
ينام الحس في دفاها
وياخذ طاقته حنّية
ويتنفس ويتعافى
ويرجع تاني للدنيا
دي أمي غير بقيت الناس
تزيد حلاوتها بالثانية
ويملك نبضها إحساس
يوزّع حبه ع الدنيا

عادي ومش فارق

"عادي ومش فارق هتعدّي"
الجملة اللي القلب بطابعه
متعود إنها بتهدّي
ف بيعمل ناسي كتير ويقول
الدنيا بتاخذ وبتدّي
تفاصيل الروح المتشالة
في كفوف الحلم المش معروف
بتزود أكثر وزن الخوف
من إنه يعدّي السور ويشوف
وفي عالم بكره المتداري
الذكرى في كراكيب الشنطة
محبوسة بكام ميزة وغلطة
ومكملة عادي في أي ظروف
وطبيعي الأيام أهي ماشية

والقلب إتأقلم ع الصدمة
ف بياخذ وقته ويتعافى
ويلم الكدمة على الكدمة
ويراكم إحساسه في جملة
"عادي ومش فارق هتعدّي"
الجملة الي القلب بطابعه
متعود إنها بتهدّي
قوانين الحب وترتيبه
في العقل تسجّل كشف غياب
والنبض نصيبه في تعذيبه
بيزيد ويقل بدون أسباب
ف بيسمح بس لنا تدخل
وفي ناس لو تعمل إيه
أغراب
وفي آخر تنهيدة بيندم
على كل الأشواق الزايفة

ف بياخذ باله من الديفوهات
في زوايا الصورة المختلفة
حواديت الضحكة المرسومة
كان فيها مشاعر مش صادقة
والصورة عشان تطلع حلوة
كان لازم نبدع في الكدبة
ونمّثل فرحنا بمجدارة
ونبان من برا إنا عادي
لا بقوة ضربات نتأثر
ولا ينزل دمنا ع الفاضي
وإن مرة وقعنا نقوم ونقول
"عادي ومش فارق هتعدّي"
الجملة اللي القلب بطابعه
متعود إنها بتهدّي

شهيد الحق

السلام عليك يا وطني
سلامي لناسي وجيراني
شهيد الحق ميموثشي
ده راجع بكره من تاني
رسالة حب بكتبها
وبطويها على دربك
بذور مدفونة في ترابها
بتجدد شباب أرضك
عشانك بيتي وولادي
أبويا وأمي وأخواتي
عشانك وطني
مكتوب لي أصون عرضك
وأخاف الفرحة تسرقني

تتوه كلمتي مني
عشان أنا نفسي توعدني
توصل فرحتي لأمي
وأبويا الحزن ليه ميحيش
وأخويا ال كنت انا شايله
وكان مصروفه ميقضيش
ف كنت أديله وأحايله
ولما ندا لي وطني جريت
وللجنة قوام حنيت
عشان غيرت لي لوني
وشوفت الدنيا بعيوني
عشان صدقت في جنوني
أنا حنيت
لا عمري في يوم قدرت أبعد ولا ملّيت
بكيت وكرهت من بكاك
ف غيرت كثير ...

عشان بهواك
ولما دمائي فيك سالت
عرفت إني أكيد واحشك
ساعتها كل تفكيري
كان إني أموت في تفاصيلك
أعاتب فيك وأشكيلك
وأهرب بيك وأعديلك
مانا اللي فوقت على صوتك
ولما احتجت لي رديت
أنا حنيت
وأنا حبيت بقيت عاشق
وسيف إحساسي فيك راشق
وأنا راضي ب أمان ظلك
بشيل مني وأكملك
تشبك روجي إخلاصها
قصاد نيلك

برغم وجعها بيك منك
بتدعيك
عشانك بيتي وولادي
وأبويا وأمي وأخواتي
عشانك وطني
مكتوبي وماليش غيرك
وآخر جملة بكتبها بلون قاسي
عشان أخشى تكون ليًا
في يوم ناسي
وتوعدي تاخذ عمري وتديني
ولما تكتفي حي
تقوم ماشي
رسالة حب بنهيتها
وجايلك غيري في مكاني
شهيد الحق ميموتشي
ده راجع بكره من تاني

اللامبالاة

أول أعراض اللامبالاة
هتسيب الحبل يقع منك
منغير ما تحاول تمسك فيه
تستسلم جداً وكأنك
ولا مرة جريت وعافرت عليه
عمرك ما تحس إنك موجدوع
أو عندك جرح لازمله علاج
بظلت تتبّت في الحاجة
أو حتى تقول إنك محتاج
بقي عندك كل الناس واحد
أشكالهم بس المختلفة
رايحين جايين... وأنت الثابت
بتقابل يومك بالبسمة

بسهولة بتضحك وسط الناس

وعموماً...

صعب يشوفوا بُكاك

البابن في ملاحك " مبسوط "

مكتومة بواقى الشوق جواك

ولا فارق مين عرفك " حُباً "

ومين كان م الأول غرضه أذاك

مبقتش تبرر أفعالك

هيشوفوا بردودك قلة ذوق

ويقولوا ده مغرور متكبر

وبيعمل بينا وبينه فروق

هتدق ببيان قلبك م الخوف

على نفسك لتكون مش عايض

وفي أول صفحة على الدفتر

هتقرر تكتب ع الهامش

وهتسأل ألف سؤال متحاش

عنوان أوجاعك كلمة " لا "
لا عتاب، لا مشاعر، لا مُعانة
هتعيد السطر من الأول
في الآخر تكتب " لامبالاة "
ياما كنت الشاري لصاحب باع
واتمرد علشانك داعمه
وقريبك شايل من اسمك
وفي ظهرك كان بيزيد طعنه
والأمل الي زمان صدّفته
ومجاش في معاده ف راح طعمه
ف ترد تقول
ما هو كله نصيب
على قد ما راح في كتير جاينين
الكسر القاطم ظهر الناس
كان شرح بسيط لبواقي حنين
متسيبش الحاجة تضيع وخلص

في الآخر تسأل راحت فين
الدمع أهو بّوش أوارقك
كتباتك ضاعوا ومش راجعين
تبت على كل الي باقيلك
وأمسك من تاني في حبل نجاة
يا تشد بقوة يا ترمي الخيط
في قاموس الدنيا يا " موت " يا " حياة "
وإن كان إحساس وسطي هتبدأ
أول أعراض اللامبالاة

نظارة شمس

أنا حد بنظارته السوداء
شاف الدنيا بنورها المغلوط
واتدفي بظلة أحلامه
يسألها نجاه
فترد سكوت
أنا صوت خايف يطلع لكن
بيخاف أكثر ليموت مخنوق
ف بيعلى لفوق كل طموحه
وسحابه يزيد مع كتر الشوق
شبورة ماضي كانت سارحة
ف إتلخبط بكره في حضن الأمس
وملامحي داريتها عن الدنيا
بصيت بعيون نظارة الشمس

نفس البحر الي شاكيت له زمان
ورميت مركبتي تعوم ع الوش
باشت أحلامي كما الورقة
غارقة الأفكار ودماغ بتوش
كل الي اتغير نوع الهم
مع عمر مبدل شكل الوش
وقلوب بتقرب وتطبطب
الصادق والي مركب وش
قرارات تتبدل ومشاعر
فيها حمل إتشال مع حمل إحط
في ناس بتجازف في الموجة
وفي ناس بتعيش وتموت ع الشط
نظارة شمس بتتخبي
ورا منها دموع بتفوق الحد
أنا كان ياما كان طفل بيرسم
مفهمش اللعبة هتقلب جد

والبيت الي بناه ع الرملة
هيدوب في المايّة عشان يتهد
عنقود الصبر الي مفرّق أوراقه سبيل
مبقاش مسنود
جه خريف وقع ورقه الدبلان
ورماه للبحر غريق مفقود
تسريب الشوق من خط الموج
زود حركة لف الدائرة
دوامة بتاكل كل شعور
ساقية وبتدور في قلوب حايرة
دنيا ودائرة..حكايات بتزول
وحاجات على قد ما كت بتطول
على قد ما خذلتني وغابت
سابت في ملامحي جروح دائمة
وداراها إزاز نظارة الشمس
وسرحت في كل خبايا النور

ولحد ما أنقذ روجي الليل
ولأجل الصورة تبان أحلى
إستغنوا عيوني عن التفاصيل
وفردت البسمة في وشي عشان
الكادر يبان من برة جميل
وانا لسه بميل على كام ذكرى
وشوية أحاسيس مش فارقة
وأهو نقل البحر سفن لبلاد
وأهو غرق مركب من ورقة
بتحن الدنيا على الفاهم
وبتدي السازج ميت علقه
كل المغلوب كان راضي الصمت
والغالب هو العالي الصوت
وأنا حد بنظارته السوداء
شاف الدنيا بنورها المغلوط

أين أنت يا صلاح

جمعة جات منغير أذان
أين أنت يا صلاح!
قسّموها الأمريكان
لما ريحة الظلم فاح
كمموا صوت العروبة
فجأة منا القدس راح
سرقوا منا القدس لكن
نسيوا إن القدس فينا
عشقتها في القلب ساكن
بعد مكة والمدينة
لما شافوا الرعب فينا
سقطوها من أيدينا
صوت رصاص القلب عالي
اقوى من صوت الدمار

ثالث الحرمين بينزف
دم سائل م الحصار
والنهار مكتوب له يطلع
مهما هدموا **100** جدار

بين أقواس

أنا حد اتسرق حلمه

فمحلّمشي

وحط مشاعره بين أقواس

وتاه قلبه بدون علمه

مكملشي

وأصبح راهب الإحساس

أنا دموعي

بتنزل بس من عيني

تريحها لوقت بسيط

وأول حزن بيحيني

برجع كل شيء في شريط

براكم شوقي فوق بعضه

وبرمي في سلة النسيان

حاجات مبقتش ليها مكان
وأثبتت في الوجع و كإن
بقي يدي لروحي أمان
ولما ببسألوا مالي
قوام بضحك بصوت عالي
بداري كتير على حالي
ليتفهم انه صوت حرمان
ولقمة تفوت ورا لقمة
حنيني لسا مش شبعان
أنا حد اكتفى من الناس
وقرر يتولد تاني
وخيط في الجروح إحساس
يهز مشاعره من تاني
سكوتي مجرد اختزالات
لأصوات عايشه جوايا
ومهما اختلفت الحسابات

هتفضل بسمتي معايا
وهفضل أكثر الضاحكين
بظبط جُملي ببراءة
و بعجب كافة القاعدين
وأعلق خجلي شماعه
تهرّيني من السائلين
ولسا في الطريق شارع
عشان أوصل لحد الباب
و سابق خطوتي حاجز
بيبعدني و مالوش أسباب
و قلقي بس من بكره
ليبقى شبيهه من امبارح
ما كل الي صبح ذكرى
ياما كان قلبي بيه فارح
وكل جميل وقواني
قوام يمشي

فرد كفه على وداني
مسمعتشي
شِتا قلبي كسا ناري
ميردتشي
أنا حد اتسرق حلمه
فمحلمشي

معلش

أنا أكثر من اتقال له
من الدنيا
" خلاص معلش "
كإن الكلمة بتداوي
وجع فرقة وخيانة وغش
أنا شوية كلام مرصوص
في كام قصة على رواية
بقوله من الوجع شعراً
وكل قصيدة بحكاية
وكالعادة أنا المظلوم
بشوف نفسي بطل ساذج
في فيلم كبير
وله أحداث وله تفاصيل

ماليها الشوق
عن الكافة ساعات بتميل
برتب جوة قلبي الناس
بدرجات قابلة للتعديل
خلاصة القول
أنا إنسان
بكل عيوبه وميزاته
ومش مفهوم
قوي... غلبان
ماشى طبقاً لحساباته
وظروف الموقف الحالي
بعمل كل شيء وأندم
بقول انا عندي أسبابي
ببرر كل أفعالي
مبكرهش وماليش غالي

بعيش الدنيا دي بمبدأ
لا بتعشم في حد يقول
ولا بعاتب ولا بصدّق
وأحن لطفل جواية
وأتشد لحاجات تافهة
لأكلة... لقعدة في جنينة
وتبسطني ساعات فسحة
وأقصى حزني م الأشياء
عشان غمّصت في الصورة
أو إن اللبس مش لايق
فكان لازم يكون أحلى
أنا من عشمي في الجايات
عرفت إن الي فات أحلى
بقيت أشتاق لمدرستي
لشكلي ويا أصحابي
ومهما كبرت مش بنسى

طابور الصبح وبلادي
ووقفت ذكرياتي سنين
حزين يمكن
سعيد جايز
لا في ضحكة ملت قلبي
ولا عقلي خلاص عاوز
عشان الحاجة محتاجها
ف تيجي في وقت متأخر
تكون كالوردة لو دبلت
خلاص مبقتش بتأثر
عشان صاحبي الي قال دايم
وعدني وإحنا ع الدكة
ياننا صعب نتفرق
وخرج من أول السكة
عشان إحساسي خانني في يوم
وثقت في ناس ف خذلني

فمش عشة وكتر سنين
عشان تقدر فيهم توصف
أنا من خبرة الدنيا
بقيس الأصل بالموقف
بقيس الحب بالموقف
بقيس الناس بكام موقف
ف مش كل البعاد أعداء
ومش كل الحبيب بيدوم
ومش كل القريب غالي
ويستاهل عليه اللوم
مراية الحب مش عامية
لكن م السهل تتكسر
ياما كان في شعور صادق
وتافه م الركنة واتعقر
أنا الشاب الي تجاعيده
ملت بدري ملامح الوش

سقط حلمه كما الأيام
بتخلص وقتها وماتعيش
أنا أكثر من إتقال له
من الدنيا
"خلاص معلش"

الحمد لله

في الآخر بسكت وبقولها
ودسيب أوجاعي لوجه الله
زي ما في ظالم في الدنيا
في رب يجبر عبد دعاه
قبل ما برفع إيدي وبدعي
أنا ثقتي يا رب في تدبيرك
لا أنا عمري بميل على كتف الناس
ولا عمري شكيت همي لغيرك
مانا روجي بريئة بتتعشم
وتمد إيديها لإيد الناس
وتشد بقوة وتمسك
ف تصدق في الي اسمه الإحساس
وتنام بجروحها في آخر الليل
تغلبها دموعها بكل حنين

ف تفوق على قوة تهد جبال
مبقاش البال بأئس وحزين
أنا كل ما برمي حمولي عليك
يرتاح القلب وينسى أذاه
صبرني يا رب على اللي بلاه
ولا تحتاج نفسي لخلق الله
اتسرب شوق من خط السير
وقفت حركة لف الدائرة
دوران مقطوع
ونهائي الشكل الإجمالي
مبقاش "دايرة"
في حاجات على قد ما بتطول
على قد ما تخذلي وتمشي
واللفة عشان تتعاد تاني
الطاقة في قلبي ما بتدومشي
وحدود الوصل الرابطة الخيط

فكّت من كتر ما زادها الشد
ف ساعدني يا رب مكنش جبان
وإكفيني شر الحوجة لحد
ويا رب إن كان مكتوب أحزان
فاجعلها تروح متسيبش جروح
وإن دخل الحب بلا استئذان
فاجعل لي خروج من باب مفتوح
العقرب رافض يمضي حضور
والساعة في عكس هواه حايرة
أنا حد رسم حلمه بإتقان
في الاخر عاش بره الدايرة
إتأكد إن مفيش مخلوق
هيدوق غير رزقه من لمقدور
وبرغم شروخ لخوف م الجاي
في شمس مازالت فاتحة النور
كل الأيام بتفوت بالدور

وخالصة الحلم يا دوب في سطور
الطيبة دي عيب والصدق غباء
وسذاجتي في عز ما أكون مشتاق
بتللم في الصبر الباقي
لما أمشي خلاص مبقاش باقي
بيقرر عقلي ساعتها يفوق
يتعلم درس جديد جواه
يستوعب إن الجرح أذاه
وأنت يا رب الي بييده دواه
أنا قومت من الوقعة وعديت
ووقفت وقولت
الحمد لله

نقطة ومن أول الوجع

كل واحد راح لحاله
ابتسامه وضحكة صفرا
قلب ميّ م الوجع
بنت قافلة الباب عليها
م الدموع عميّ عنيها
وببساطة القصة خلصت
بس شرخت قلبها
كات تقول من حزنها
هوليه راضي ببعادي
مستحيل أنا هونت عادي
الشريط بيدور قصادي
صورة صورة من البداية
لقطة النظرة البريئة

لما قَرَّب من عيوني
وقال نسيت كل الكلام
كان يوماتي بيفتكرنى
بأي كلمة وكام سلام
يخترع مواضيع كثيرة
قالي عندي إنتي الأميرة
وإنه كان فاقد يعيش
إن كل مشاعره ماتت
وإن روحه لقاها فيا
قلبي نساها الي فاتوا
جايي شوكلاتة وورود
وابتسم وطلب لي قهوة
وقالي مش فاهم ملخبط
قالي باين ده اسمه حب
يومها بس فهمت جايز
إني بنت وعندي قلب

وابتديت يبهرني فعله
لما كان يفهم بنظرة
كل حاجة أنا نفسي أقولها
السعادة كانت يشوفني
وإني نجمة مناه يطولها
كان بيزعل لو تفوت
على حبنا ساعتين سكوت
قلبي دق خلاص وسلّم
وقال بحبه بأعلى صوت
وإنه نعمة كثيرة عليّا
وربي عوض قلبي خير
وإن إحساس السعادة
حاسة فوق منه بكثير
وإني مش عاوزة ببساطة
غير يدوم إحساسه بيّا
مش هيفرق إيه معاه

وسابله إيه الماضي ليّا
مش هيفرق أي حاجة
إلا بس شعوره بيّا
التناكة في المعاملة
والغرور والثقل راح
كل مدا أضعف له أكثر
كل عطر في روحي فاح
كنت بستغربني أصلاً
حد مش شبهي في طباعه
حد بيمهد لموته
لما كل مشاعره ضاعوا
الكلام بيقل جدا
والمعاملة بقت غريبة
حتى زعلي يهون يسببه
يوم سكتنا وعدّي غيره
عدّي تالت عدّي رابع

إبتديت من ثاني أدور
ع الكرامة وأي مانع
يحجز الشوق الي فيّا
أي شكل أبان قويّة
الحكاية في روجي عايشة
وعنده يمكن وقت عدّي
روحه خلطت دمه فيّا
ولللخروج مش مستعدة
والنتيجة القلب تريس
فوق جروحه بألف قفل
لا هو له ولا عاد لغيره
مكتفي جدا وراضي
والشعور أهومات قصادي
ماسكة شوقي ومانعة نفسي
أصلي كنت بقول ده نفسي
الي بيها هعيش سعيدة

بس في الآخر وحيدة
عائشة ع الذكرى الأخيرة
لما دمعي نزل قصاده
وقالي أنا جنبك حبيبك
قلبي ما صدق لقاكي
مستحيل أبعد وأسيبك
بس فجأة بدون مبرر
اختفى وفارق حبيبي
أما زاد عشمي في عتابه
شاف كلامي مالوش لزوم
ع العموم أنا قبل ما أمشي
نفسي أقوله في كل يوم
إني عمري ما هقدر أنسى
أو أسامحه في وجعي جايز
بس هشكر قلبه جداً
كل أحاسيس السعادة

شوفتها منه وعشانه
كنت بستعجب حنانه
ولو مكنش قابلني صدفة
مكنش عرف القلب فرح
أنا خلاص مش عاوزة حاجة
مكتفية بذكرياتي
بدعي له من قلبي لسه
كل واحد راح لحاله
رغم قلبي الي اتخدع
ابتسامه وضحكة صفرا
وقلب مبيت م الوجع

أجمل حد

مساحة عيني في الرؤية
بتوصل فيك لأبعد حد
بشوف الكل شيء عادي
وأشوفك عندي أجمل حد
وعلى مسرح حدود قلبك
على الكرسي الأخير جداً
بشب لفوق أقول جايز
أدان الحب يوم يدن
وأكمل صورتي في خيالي
عن الحلم الي لسا بعيد
وشوقي ينادي متداري
كإن الفرحة بالمواعيد
وطن محتاج لي في السقفه

وبين كفوفي نار بتزید
وجع مكتوم بحبة لوم
ومتقسم تلت عدّات
في سَقفه بيك بتتباھی
وعلى كتف الأمل بتبات
وسَقفه بتیجی محرومة
بتسقي وجعها بالكلمات
وأخر سَقفه أعلاهم
مُشتت عشقها بثبات
ومهما تتوجع منك
بتمسك فيك لآخر شوق
وضوء حبك وطن تاني
بتیجی الشمس منه تدوق
وتبقى الظلة تنهيدة
وأحس الحب فيك مسروق
بدوّب دمي بين نيلك

وأشوف في مرآة الدائرة
إيدين غيري بتدعيلك
وصوت همسات قلوب حائرة
وبتأكد... بيان الساحة مليانة
وإنك صعب تلمحني
فبطلع سلم المسرح
وباب العودة مفتوحلي
بجبك من طرف واحد
ومسموح للحبيب بالبوح
ومجروح الشعور لكن
عطور الصبر ناوية تفوح
أنا مش أول العاشقين
ولا عشقي غنا وكلمات
ولا بمدح هواك... هرمك...
شوارع شاهده ع الحكايات
أنا إخلاصي في سكوتي

وصوتي عالي فوق الحد
لكن متخبي جوايا
لحين تفهم تحب مجد
مساحة عيني في الرؤية
بتوصل فيك لأبعد حد
أشوف الكل شيء عادي
وأشوفك عندي أجمل حد

الفرقة

الفرقة توهمة في وسط ناس
إحساس إهانة واستهانة
ياللي أنت ناسي أقرب ما ليك
أنا لسا عندي ليك امانة
أنا ميت سؤال في إجابة واحدة
أنا واحدة ملهاش غير حبيب
لو خيروني في كلمة واحدة
أنا وطني دائي والطبيب
أنا صوت ضعيف مكتوم في حلقك
أنا ظل محني فوق كتافك
وعيون بتحضن دمع جرحك
على قد ما تحبك تخافك
مليون شعور متلخبطين

اتبعتروا في حبة سنين
والعشق من جوف الأنين
ياما ارتوى
أنا وطني دائي والدوا
يا شمس مغيمة فوقي
مليتي العتمة ع الشطين
أنا موضوع في فصل كبير
حكايته بس من سطين
يا وطني يا ساهي عن همي
إيديا مربطة الاتنين
وعهد الحب إجباري
لكن الحب
له طرفين

صوت الوطن

شارعنا بقي م الفقر نظيف
حواري فاضية وضوءها ضعيف
وعماراة واقعة
وسيل ومجاري
وقطر مقلوب ع الرصيف
وطفل دمه على كراسته
فتافيت ملامحه في شنتطه
بقاياها لا تنفع حتى لدفنه
ولا تشفي أبوه من قهرته
كلام كتير محشور في الزور
مين الي فينا عليه الدور
الأخ يدبح عادي في أخوه
بحجة إن العجلة تدور

تفكيرنا سر و مش مسموح
آراءنا لينا و مش للبوح
ورقنا مكتوب بالكربون
الجرح مهما يضيق... مفتوح
لحن الأغاني بيعزف خوف
صوت الوطن على طول مبحوح

كان زمان

كان زمان حلمي الصغير
أبقى اسم وله مكان
كان طبيعي أنا بيكي لكن
كانت الفرحة بجنان
كانت براءة الضحكة فيّا
هي نبراس الأمان
وأما كبر حلمي سقفه
قالوا اصحى آن الأوان
افهم الواقع وعيش
أصل حلمك ميساويش
والحياة أكبر خرافة
واحنا بنشجع ونلعب
يعني تعاملها بلطافة
وهي تضحك لي يغلب

أخلاق

اثبت وجودك في الحياة بضمير
اسمك، ملامحك، لهجتك... أرزاق
مش فارق أنت بأي دين أو لون
وحده الي سايب بصمتك... أخلاق
مش بس واجبك
فرض صوم وصلاة
أو بيت وعيلة
ومال بتجري وراه
ربي ولادك ع الأصول والخير
الدين معاملة
وناس تخاف الله
يا كل مصري
إدى وطنه وعود
بلدك أمانة وعايضة فيها أسود

زوّد حدود أملك
ومد إيديك
طول ما أنت على سد العادات مسنود
ساعد ضعيف
إنه يعيش في أمان
راعي اليتيم
متسيبش فيها جعان
وإن زاد عليك الحمل متميلش
خليك جدير
إنك تكون إنسان
وعشان تبان صورتك بكل وضوح
خَيّ الطموح هدفك
ومش مسموح
بالصمت عن حق الوطن والأهل
والجهل إنك تبقى صوت بلا روح
كام شخص جيت عليه في يوم وندمت

وبدال ما تحترمه
شتمت وهنت
لا القوة إنك تفترى على الناس
ولا الرجولة إنك تعاكس بنت
كل الوجع
سهل تلاقيله علاج
إلا وجع
تربية بلا أخلاق
مش فارق أنت بأي دين أولون
وحده اللي سايب بصمتك
أخلاق

اختياري

اختياري لاني أحبك
كان مجرد فطره فيّا
كنت مجبر إني أقولها
وأبقى قد المسؤليه
علموني إن البلد دي
عشقها واجب عليّا
كنت بهرب م الكلام ده
كنت برسم في الشوارع ع الحيطان
كان تقيل نشيد بلادي واستيعابي
للجرس ويا الأذان
كنت آه بسخر في سري
لما أبويا يقولي دي بلد الأمان
طبطيبي يا بلدي يالا
هاتي نايمي من الفساد

إخنتي صوتي في عروقك
كمي حلمي اللي زاد
و علا سقفه فوق حدودك
صبري جوع الوليد
حني ليه على قد شوقك
ألف قلب عليكي باقي
وأنتي سقيانا بجرورك
عدت السنين في لحظة...
و الشهاده بقت في أيدي
عندي ليكي ميت ملاحظة
وأنت مكنتيش ملاحظة
إنك إنتي بقايا عيبي
وإني أفارقك ده قراري
كنت عايش فيكي ميت
بس ثابت في اختياري
إني أسيبك... وإني أغيب

ثقتي بس في حاجة واحدة
إني منفعكيش حبيب
بعدت عنك و بمزاجي
وأما روحت عرفت قيمتك
اكتشفت إنك علاجي
لما عن غيرك قارنتك
كنت بفخر بيكي دائماً
وابتسم لو جابوا سيرتك
كنت بستغرب دموعي
لما توحشيني وأبكي
إمتي يجي يوم رجوعي
إمتي أقولك إني آسف
كنت دائماً ابن عاصي
من قساوته مكنش شايف
أم فاتحة دراعها ملجأ
للي قاعد و اللي بايع

لنورك إنتي قمري ساطع
والنهارده أنا جاي وراكع
لحضن أُمي جاي وشاري
لوزمان كان حبي غضب
دلوقتي عشقك
ياختياري

العتاب

العتاب...

بيكونله وقت وينتهي

لو نماطل فيه

يزوّد في العذاب

والي غاوي سكوت

يقرر يبتدي

يجمع الأحداث

يرتبّ في الحساب

والي بادر بالكلام

كل حواراته إتهام

والي ساكت قلبه دام

يطوي صفحة

قديمة باهتة في الكتاب

و الي يسأل عننا يلقي الجواب
مفيش...عادي... أنا راضي
أنا أصلاً مبزعلشي
و حزني ده مالوش أسباب
كلام بنقوله وبنوقف سؤال مطروح
عشان الرد متداري
و مش مسموح
و شاب الهم جوانا
قتل فينا... حلاوة البوح
مفيش... عادي... أنا راضي
أنا أصلاً مبزعلشي
إيه يعني حلم مكملشي

العبرة بالنهايات

علشان تحكم ع الأصل ياريت

تختار العبرة مع النهايات

الراجل مربوط من كلمة

وما شابه ذلك

عدا وفات

هتقابل أشخاص في حياتك

هتقرب منك بزيادة

هتشاركك تفاصيلك جداً

وتحس وجودهم بقى عادة

وهتربط أفراحك بيهم

وإن وجعك شيء هتروح ليهم

وتصدق إن مفيش غيرهم

والدنيا إدارت في عنينهم

هتنام وتقوم وتحس بخوف

وهتقلق وتراجع روحك
ماهو عشمك في قلوبهم دايم
والناس دي بتسحب من روحك
هتبرر أفعالك ليهم
وتحاول طيببتك ترضيهم
هتعيش مظلوم وتقول أعذار
على إنك مش قاصد تجرح
وغريبة إن أنت تكون راضي
من كتر ما كان نفسك تفرح
تهديهم بساتين أحلامك
يدوك الوردة الدبلانة
الضحكة دي كانت من طبعك
دلوقتي ملامحك بهتانة
بأمانة هتحلف وتصمم
على إن مازلت أنت الباقي
هتقول الساقية الدوّارة

خلطت من دائي على دوائي
هيلخص قلبك كام إحساس
من ناس خذلك ومايستهلوش
كل أما هتكتب م الأوجاع
هتسيب ورقك في الدمع يبوش
وبرغم تعب قلبك وأذاك
مايهونش عليك تغلط فيهم
هتقرر تنسى... ف تتناسى
وهتسهر ليل بأس ندمان
وحزين لسذاجتك وبرائتك
وهيبدأ عقلك في النسيان
إن كان فيهم خير مكتوبلك
ف طريق الخير ثابت هييان
ف تفوق وتقرر خطواتك
وتلاقي يان أنت الكسيان
ماهوربك شافهم مش شبهك

وعشان كدة رزقك بالحرمان
وهتيجي الساقية الدوّارة
وتلف الغالب ع المغلوب
وهيجي اليوم الي تلاقي
الواجع راجع نفسه يتوب
ونهاية القصة إن العبرة
مش لهفة مع بداية الحكايات
علشان تحكم ع الأصل ياريت
تختار العبرة مع النهايات

السيرة الذاتية للشاعرة



إسراء محمد سالم

الوظيفة: مدرس مساعد بقسم اللغة الفرنسية

كلية الآداب

جامعة العريش

مواليد الإسماعيلية

خريجة مدرسة سان جوزيف الفرنسية

ليسانس الآداب والعلوم الإنسانية في اللغة الفرنسية

وآدابها، تقدير جيد جدا مع مرتبة الشرف، كلية الآداب

والعلوم الإنسانية، جامعة قناة السويس.

ماجستير في اللغة الفرنسية، بكلية الآداب جامعة قناة

السويس.

صاحبة ديوان (بياع سوداني) بمعرض القاهرة الدولي

للكتاب 2018.

حاصلة على شهادة الدلف الفرنسية الدولية.

عضو نادي أدب الإسماعيلية.

عضو رابطة شعراء خط القنال.

حاصلة على عدة جوائز في مجال الشعر العامي.
حاصلة على المركز الأول على مستوى الجمهورية في
مسابقة الشعر التابعة لنقابة الأطباء البيطريين لعام

.2019

لها العديد من البرامج الإذاعية والتلفزيونية.
حاصلة على دورات معتمدة من المركز الكندي للتنمية
البشرية قيادة دا إبراهيم الفقي (رحمة الله عليه).
حاصلة على الكورسات المؤهلة لسوق العمل في مصر
بمشاركة أكبر معاهد و مراكز التدريب في مصر لعام

.Edu Egypt ITI 2011

للتواصل

<https://www.facebook.com/pages/Is-raa-salem/196263433902013?fref=ts>

محتويات الديوان	
3	الإهداء
5	مقدمة الديوان
10	بداية ونهاية
16	برا صندوق الحياة
21	أمي
25	عادي ومش فارق
28	شهيد الحق
32	اللامبالاة
36	نظارة شمس
40	أين أنت يا صلاح
42	بين أقواس
46	معلش

52	الحمد لله
56	نقطة ومن أول الوجع
63	أجمل حد
67	الفُرقة
69	صوت الوطن
71	كان زمان
72	أخلاق
75	اختياري
79	العتاب
81	العبرة بالنهايات
85	السيرة الذاتية للشاعرة
88	محتويات الديوان

جميع حقوق النشر الورقي
و الإلكتروني محفوظة للناشر